

## **UDALEKU IREKIAK / 2024: OINARRIAK**

2020an mankomunitateak udaleku irekiak eskaintzeko zerbitzua kontratatzeko prozedura egin zuen, eta zerbitzu hori Dindaia Fundazioari esleitu zitzaion. Plegu arautzailearen 6. artikulua kontratua 4 urtez luzatzea aurreikusten duenez, aurten ere fundazio horrekin kontratua egitea xedatu zuen lehendakariak, martxoaren 18ko 10/2024 ebazpenaren bitartez.

### **Helburuak**

---

Udaleku irekien helburu nagusia da aisialdi giroan haurren artean euskararen erabilera sustatzea. Halaber, udalekuetan honako balio hauek ere landu nahi dira:

- Hezkidetzak
- Kultur aniztasuna
- Inklusibitatea

### **Adinak, datak eta tokiak**

---

#### **Adinak**

Udalekuen eskaintza 2012-2020 urteen bitartean jaiotako haurrei egiten zaie; haurrek eskolatuak egon behar dute. Behar bereziak dituzten haurren kasuan, adin muga 15 urtekoa izanen da (2009-2020 bitartean jaiotakoak).

#### **Datak**

Arantza, Bera, Etxalar eta Igantzin uztailaren 1etik 26ra, biak barne (4 aste; asteka izen emateko aukerarekin). Lesakako kasuan uztailaren 15ean hasi eta abuztuaren 30ean bukatuko dira (7 aste; asteka izen emateko aukerarekin); Lesakan eskainiko diren azken 3 aste horien kudeaketa eta gastuen ordainketa udalaren gain geldituko dira.

#### **Ordutegia**

Arantza, Bera, Etxalar eta Igantzin udalekuak 10:00-13:00 bitartean izanen dira. Lesakako kasuan ordutegia 09:00-13:00 bitartekoa izanen da.

#### **Tokiak**

Arantza: Arantzako Herri Eskola  
Bera: Ricardo Baroja I.P. / Labiaga Ikastola  
Etxalar: Landagain I.P.  
Igantzi: Igantziko I.P.  
Lesaka: Irain I.P.

### **Behar bereziak dituzten haurren parte hartzea**

---

Inklusibitatea udalekuetako balio bat izaki, behar bereziak dituzten eta begirale bat behar duten haurrentzako 3 plaza gordeko dira. Haur horiek begirale bana behar dutela erabakitzeko orduan osasun eta hezkuntza arloko profesionalek aurkeztutako txostenak hartuko dira aintzat. Adinari dagokionez, 15 urte bitartekoek parte hartzen ahal dute (2009-2020 bitartean jaiotakoek). Izen emana ahala beteko dira plazak.

## **Eskainiko diren plaza eta begirale kopuruak**

---

Aurrekontuaren arabera gehienez ere 20 begirale kontratatzen ahal dira. Beraz, hasierako eskaintza hauze litzateke:

- Ratioak: Haur Hezkuntzako taldeetan gehienez ere 8 haur; Lehen Hezkuntzako taldeetan gehienez ere 10 haur.
- Eskainiko diren talde kopuruak honakoak dira:
  - Beran zortzi talde:
    - 3 HHkoak (bakoitzean 8 haur x 3 talde = 24 haur)
    - 5 LHkoak (bakoitzean 10 haur x 5 talde = 50 haur).
  - Lesakan sei talde:
    - 3 HHkoak (bakoitzean 8 haur x 3 talde = 24 haur)
    - 3 LHkoak (bakoitzean 10 haur x 3 talde = 30 haur).
  - Arantza, Igantzi eta Etxalarren bina talde:
    - 1 HHkoa (bakoitzean 8 haur x 3 herri = 24 haur)
    - 1 LHkoa (bakoitzean 10 haur x 3 herri = 30 haur).

Modu horretan 20 talde lirateke, eta guzira 182 plaza oso eskainiko lirateke. Halere, eskaintza hori malgua izanen da eta izen emateen arabera moldatuko da, betiere aurrekontuaren arabera kontratatu daitekeen gehieneko begirale kopurua kontuan hartuta. Horrez gain, izen emateko epea bukatu ondotik herri bakoitzean izandako eskaeren arabera ere molda daiteke talde eskaintza hori.

Behar bereziak dituzten haurrentzako 3 plaza gordeko direnez, izen emate horien arabera honela moldatuko dira taldeak:

- Behar bereziak dituen haur batek izen emanez gero, Beran 7 talde eskainiko dira.
- Behar bereziak dituen bertze haur batek izen emanez gero, Lesakan 5 talde eskainiko dira.
- Behar bereziak dituen hirugarren haur batek izen emanez gero, Beran 6 talde eskainiko dira.

Herri bakoitzean udalekuak antolatzeke gutienez 15 hurrek izen ematea beharrezkoa da.

Plaza kopurua mugatua da. Izen eman ahala onartuko dira parte hartzaileak, eskainitako plazak bukatu arte, eta beti ere arestian aipatutako baldintzak betetzen badituzte.

## **Izen ematea eta parte hartzeke baldintzak**

---

### **Parte hartzeke baldintzak**

Partaideek honako bi baldintza hauek bete beharko dituzte:

- Bortzirietako udalerriren batean erroldatuak egotea edota bertako ikastetxeetako ikasleak izatea.
- Udalekuak euskaraz direnez, parte hartzaileek D edo B ereduak ikasi behar dute.

Mankomunitateak baldintza horiek egiaztatzeko behar diren agiriak eskatzeko eskubidea du, udal eta ikastetxe bakoitzean.

Izen emateko epea bukatu ondotik plazak soberan izanez gero, Bortzirietan erroldatuak ez diren edota bertako ikastetxeetako ikasleak ez diren haurrak matrikulatu ahal izanen dira, baina ezinbertzeko baldintza izanen da D ereduan matrikulatuak egotea. Hori egiaztatzea familiari dagokio.

### **Izen ematea**

Izen emateko bide bakarra online izanen da, eta horretarako erabiliko den formularioan emanen dira datu guztiak, baita baimenak eta osasun oharrak ere.

Izen emateko epea zabalik egonen da udalekuen berri ematen den unetik hasi eta maiatzaren 31ra arte.

Izen ematea asteka egin daiteke. Udalekuetan onartuak izan diren haurren asistentzia kontrolatuko da. Astebetez udalekuetara justifikatu gabe joaten ez diren haurrek plaza galduko dute eta erreserban daudenei parte hartzeko aukera emanen zaie. Plaza galtzen duten familiek ez dute dirua berreskuratzeko aukerarik izanen.

### **Matrikulen prezioak eta ordainketak**

Honakoak dira matrikulen prezioak 2020az geroztik (udalekuetako ordu bakoitzeko 1,5 euro):

- Arantza, Bera, Etxalar eta Igantziko kasuan (asteen 15 ordu):

	Aste 1	2 aste	3 aste	4 aste
Ume 1	22,50 €	45,00 €	67,50 €	90,00 €
2 anai-arreba (-%15)	38,25 €	76,50 €	114,75 €	153,00 €
3+ anai-arreba (-%30)	47,25 €	94,50 €	141,75 €	189,00 €

- Lesakako kasuan (asteen 20 ordu):

	Aste 1	2 aste	3 aste	4 aste	5 aste	6 aste	7 aste
Ume 1	30 €	60 €	90 €	120 €	150 €	180 €	210 €
2 anai-arreba(-%15)	51 €	102 €	153 €	204 €	255 €	306 €	357 €
3+ anai-arreba (-%30)	63 €	126 €	189 €	252 €	315 €	378 €	441 €

Modu berean, matrikula ordaintzeko epea ekainaren 9ra artekoa izanen da; egun horretarako ordainketa ez badago egina, izen emateak balioa galduko du.

### **Egoera ekonomiko zaurgarrian dauden familientzako prezioak**

Udalekuetan izen ematen duten haurren familiak egoera sozioekonomiko ahulean baldin badaude, ezarritako prezio horien % 50 ordaindu ahal izanen dute, izen emateko formularioan aukera hori klikatzen badute. Mankomunitatea ikaslearen ikastetxearekin jarriko da

harremanetan, familiak Hezkuntza Departamentuak ezarritako irizpideak betetzen dituen egiazta dezan.

Prezio hori aplikatzeko Nafarroako Gobernuko Hezkuntza Departamentuak ezarritako irizpideak hartuko dira kontuan, hau da, 2023-2024 ikasturterako 2022ko errenta aitortpena, zehazki bertan ematen den zerga oinarria eta familiako kide kopurua:

Familiakide kopurua	Zerga oinarria
Kide bat	12.720 €
2 kide	15.792 €
3 kide	17.988 €
4 kide	19.308 €
5 kide	20.628 €
6 kide edo gehiago	21.504 €

Errenta aitortpena egitetik salbuetsita daudenek edo Nafarroara berriki iritsi direnek Oinarrizko Gizarte Zerbitzuen oniritzia jaso beharko dute, egoera sozioekonomiko ahulean daudela egiaztatuz.

### **Dirua itzultzea**

Behin izena emanda, udalekuetan bajak izanez gero, ordaindutako diruaren itzulketak modu honetan egingen dira:

- Udalekuak hasi aitzinetik baja justifikatzen bada (eritasuna edo azken orduan sortutako arazo larriren bat, agiri bidez justifikatuta), matrikularen % 100 itzuliko da.
- Udalekuak hasi ondotik baja justifikatzen bada (eritasuna edo azken orduan sortutako arazo larriren bat, agiri bidez justifikatuta), matrikularen zati proportzionala itzuliko da (izena emanda dagoen epean falta diren egunei dagokiena).
- Udalekuak hasi aitzinetik baja emanez gero justifikaziorik gabe, matrikularen % 50 itzuliko da.
- Udalekuak hasi ondotik baja emanez gero ez da dirurik itzuliko.

Edozein kasutan, matrikularen dirua itzuli behar bada, bankuko gastuak beti familiaren gain izanen dira.

### **Udalekuen berri ematea**

---

Udalekuen berri emateko bide hauek aurreikusten dira:

- Webgunea eta sare sozialak. Mankomunitateak erabiliko dituen ereduak udalei ere bidaliko dizkie, haiek ere zabal dezaten.
- Euskarri digitala oinarrizko informazioarekin eta izen emateko estekarekin (ele biz).
- Komunikabideak.
- Familientzako eskutitza, ikastetxeen bitartez zabaltzeko.

Euskarri guzietan izen emateko lotura erantsiko da, baita udalekuen baldintzak zehaztuko dituen dokumentua ere. Ez da aurreikusten papereko euskarririk.

### **Udal bakoitzaren egitekoa**

---

Mankomunitatea udalekuen antolaketaz eta kudeaketaz arduratuko bada ere, udal bakoitzaren esku gelditzen da erabiliko diren espazioak egokitzea eta garbitzea. Mankomunitateak eskaera eginen dio udal bakoitzari. Hasiera batean eskaera orokorra izanen da, eta izen emateak egin ondotik udalekin nahiz ikastetxeekin adostuko dira erabiliko diren espazio zehatzak.

### **Aurrekontua (behin-behineko datuak)**

---

#### **Diru sarrerak:**

- Bortzirietako Gizarte Zerbitzuen Mankomunitateak 2024ko aurrekontuan udalekuek sortzen duten defizitaren erdiari egiteko 6.000,00 euroko diru partida aurreikusia du. Hori izanen da gehienez ere aportatuko duen kopurua, udalekuetako gastu eta sarreraren balantzea ikusi ondotik.
- Euskarabideak toki entitateetan euskara sustatzeko eta erabiltzeko jarduerak diruz laguntzeko egiten duen urteroko deialdiaren bidez mankomunitateak dirulaguntza eskuratzen du udalekuak finantzatzeko.
- 262 haurrek parte hartuta, familiek ordaindutako matrikuletatik 18.278,75 euro bildu ziren 2023an.

#### **Gastua:**

- 2020an egindako esleipenaren prezioa 30.919,49 eurokoa da. Bortzirietako Euskara Mankomunitateko Batzorde Erabakitzaileak 2024rako onartutako aurrekontuan ere kantitate hori jasotzen da udalekuak antolatzeko. Zenbatekoa jaits daiteke, eskainitako plazak ez badira betetzen eta haur talde gutxiago sortzen bada (begirale gutxiago beharko lirarteke).
- Gastu horretatik aparte daude udalekuen berri emateko egin behar diren euskarrien gastuak. Ttipi-ttapa Fundazioak egindako aurrekontuaren arabera, gastu hori 465,85 eurokoa izanen da (BEZ barne).

### **Datuen babesa**

---

Erabiltzaileen datuak horiek babesteari buruzko abenduaren 5eko 3/2018 Lege Organikoan ezarritakoaren arabera tratatuko dira. Lizitaziorako plegu arautzailean honela zehaztua dago datuen babesari dagokiona:

Bortzirietako Euskara Mankomunitateak erakunde esleipendunaren esku utziko ditu honako datu fitxategiak:

- Udalekuetako partaideei buruzko datuak.
- Udalekuetako partaideen osasun txartelen fotokopiak.
- Udalekuetan parte hartuko duten behar bereziak dituzten haurrei buruzko txostenak.
- Udalekuetako partaideen guraso edo tutoreei buruzko datuak.

Erakunde esleipendunak udalekuen antolaketarako eta garapenerako bakar-bakarrik erabiliko ditu datu horiek, eta udalekuak bukatutakoan guziak deuseztatu egingen ditu, edo mankomunitateari itzuliko dizkio. Datu horiek aipatutako moduan eta errandako helburuekin tratatu ezean, erantzule bakarra erakunde esleipenduna izanen da, eta hark erantzun beharko die bai hirugarren pertsoneri eta entitateei, bai mankomunitateari, sortzen ahal diren kalte edo galerengatik.

Mankomunitatearen datu kudeaketari dagokionez, honakoa zehaztu behar da:

Tratamenduaren arduraduna: Bortziriako Euskara Mankomunitatea. Helburua: Izen-emateak kudeatzea. Eskubideak: Datuak eskuratu, zuzendu eta ezabatzeko eskubidea duzu, bertzeak bertze, mankomunitatearen bulegora edo helbide elektroniko honetara joz: [euskara@bortziriak.eus](mailto:euskara@bortziriak.eus). Informazio gehiago: [Pribatutasun Politika](#)

Arantzan, 2024ko apirilaren 10ean